

南州先生其選也。現因遊歷各國。至伊犁。持方絮索詩。不勝欽

感。卒成二律。恭錄奉粲。並祈斧削。是荷。署伊犁綏定縣事。段子麟

本是蓬萊島上仙。須臾繞徧地球圓。千尋駭浪人穿海。萬里乘槎客到天。
列宿心胸羅廿八。涵空世界覽三千。歸時取展新圖看。袖有坤輿數點煙。
欣從塞外晤名儒。可是徐公返故都。腹在漢唐三代事。胸藏瀛海九州圖。
微官匏繫貧如洗。異國文同德不孤。莫厭邊城荒落甚。且聽好鳥盡提壺。

光緒丁未孟夏。南州少佐自東京來遊。經過烏孫。得瞻丰采。

捧讀佳什。深佩壯懷。俚句持贈。即希吟壇正之。湘西吉齋氏。賀著謙

乘槎客自日邊來。萍水相逢笑語陪。我亦風塵經歲月。爲憐行旅把樽開。
友邦盟約訂咸和。肄業遨遊海國多。惟問中朝諸弟子。而今成就竟如何。
戰場回首尙驚心。復越華疆幾萬程。專闢更兼專對任。不慚戎馬一書生。
目送歸鴻客憶鄉。人生相見感參商。青油幕裡無長物。南浦聊題詩一囊。

丁未孟夏。日本少佐南州先生吟正。寶臣。希賢

揮毫寫意本天然。名士風流非等閒。歷盡山川真面目。始能脫藁有無間。